

Polko Sokome Korete Qu Nakayáñoní Topé Timoti ñuno Uró

Mande Kembé

Komo suki uni kato sokome ña **Grik** mandewore nakayáñaró, ko eneño owí nekaró, “Pol,” yaró. Uni ñuko **asáñowí uni** Pol nange. (*1 Timoti 1:1* weyo qembe.) Timoti ñuko Pol koro kho kopo ka, iwí muko Grik uni ka, nimí muko Juda ññondutu pare ka. (*Asá yerewí Uni 16:1* weyo qembe.) Enendo Pol koya kho tero uyareyara. Itaka ñño-ñño uni kumimbo ñande ye ññoyotenggo, ko Polko **Rom** ñuno kusi-kusi yano yora, quko kumima naru 62AD ñuno re rotoyi toñjeró, peka. (Asa “62AD” murí muko ñandiro, ko Yesu nimí pisiyaró, yate kumima naru 62 ñunde rotaró. Nore kumima naru 2,000 ñunde rotoro yate itaka yoteto.)

Asa re rotoyi Polko Timoti koya Taitus koya toñjero Spen mira andusina ñuno uyarengurí. Ñuno uyaro kho tero 63AD ñuno pitu ko Masedonia mirako, Esia mirako, Kiriti noko mosowímo ñuno uyarero kho taró, peka. Kho kini tiníño, Efesus yendémo ñuno uro Timoti ñuno re rotoro Korin yendémo ñuno uyaro kunditaró, peka. Ñu yendémo ñuno sokome ña nakayáñoro riní Timotiko Efesus ñuno uró.

Polko kusi-kusi yano yoraró quño ñuno **Anutu koro huru-huru** soso ene Masedonia mirako ñuno ñuya Esia mirako ñuno ñuya yoriní tunoqaró ñuko parámi tero sowe tero huru-huru keta ñuya ri tañgurí. Quko enendo ñuya quhurí enesó-enesó korowoyañgurí. Ñunde ñuroko Polko Timoti re rotoní **unipare meté horé** ñu rukiso yerewero kho taró.

1 ¹ No Pol, Kristo Yesu koro asáñowí uni^a ka, dokoro Anutu, Rambaruru Konjo Norewero Uni ñuya Kristo Yesu,^b o meté

^a **1:1** “*asáñowí uni*” ñuko Yesuko rokóñoro asáñoní eneño khoýó taró. ^b **1:1** “*Kristo Yesu*” - komo suki *ye-ye unindo* Anutuko uni ka rokóñoní mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “*Mesaiya*,” ye nekangurí. Asa Yesu mahiní eneño unipareyó, “Kristo Yesu,” ma, “Yesu Kristo,” nange ye nekangurí.

sopoyoteto ŋuro murí ŋuyako no rokó niririyó.

²Timoti, sokome ŋa keŋo nakayáŋoteno. Keto iŋondutuwiqo, neneŋo naŋone hamó tunoqaró. Anutu Awandoya Kristo Yesu, Uni Paráminanimboya samaka-samaka tuwó te kunoro, sikíŋge te kunori, newonde imemo yoroweya.

Uni kumimbo mande enesó-enesó rondaqe yunowaŋgo

³Komo, no Efesus yendé rotoro Masedonia mirako uyarewero tanowó quno ŋuno mande ŋande kimiranowó, ko Efesus ŋuno yotoya Anutu koro unipare ŋu sopo yere qembe. Ŋunde tero uni kumi mande kondé ŋande yimito qembe, “Ye unipare mande enesó-enesó ma rondaqe yunoyowero. ⁴Kowe ye sowo mande kina-kina koya usisambatoro owéye qambu ŋuro kondé ma iŋowero.” Ŋunde yimito qembe, dokoro o soso ŋunde quko kiro mande nange riní tunoqeyote, Anutu koro kho qu ka kama teyote. Kini, nore iŋondutuware nange Anutu koro kho qu teyoteto. ⁵Mande kondé ŋuro murí muko ŋandiro, uni soso newondeye sara-sara tiní, oteteye sopowero quro iŋo-iŋo meté mu tero, iŋo-iŋo hamó qu teyowaŋgo, ko ŋunde tero topoye newonde meté yunowaŋgo. ⁶Uni kumimbo otete ŋu rotoro, kape-kape tero, mande kina qu howeyoteŋgo. ⁷Uni ŋundo hutuŋo mande^c ŋuro murí ŋu kondé rondaqe yunoyoteŋgo, quko mande ŋu hamó kama iŋoyi tondaŋeyote.

⁸Nore iŋoteto, ko uni kato hutuŋo mande ŋu iŋoro hamó howeyote tiníqo, hutuŋo mande ŋundo o meté ka riní tunoqeyote. ⁹Hutuŋo mande ŋuko unipare roneneŋowí^d roŋgaru yerewero koro kini. Kini, unipareto otete piyimi teyoteŋgo ŋu roŋgaru yereyote. Oteteye piyimi ŋuko ŋandiro: hutuŋo mande wendaqeyoteŋgo ko wiri yerete uni mandeye kama howeyoteŋgo; Anutu huwóŋoyoteŋgo ko quhurí teyoteŋgo; Anutu koro oteteyó rotoyoteŋgo ko noko koro otete qu howeyoteŋgo; awanáye yuroyi khumoteŋgo, unipare meyowo yuroyi khumoteŋgo; ¹⁰se simbururu teyoteŋgo ko urumuni kaya urumuni meyowomboya eneqaŋge se simbururu teyoteŋgo; meyowomboro simóye momo teyoteŋgo; mande kota yeyoteŋgo ko mande khono ŋuno uni kaná yereyoteŋgo. Otete meyowo ŋuya teyoteŋgo, ko otete soso ŋuko mande hamó mu rondaqe yunanowó ŋu ri umbuyote. ¹¹Mande hamó ŋuko Anutu meté horé ŋundo miti mande^e kekere ŋu re nunoní yesowanowó ŋu howeyote.

^c 1:7 “*hutuŋo mande*” ŋuko komo suki Anutuko *Sainai* purímo *Moses* inoní Israel unipare yunaró. Mande ŋuko Juda uniparetoro yoto-yotoye soso sopoyaró. ^d 1:9 “*unipare roneneŋowí*” ŋuko Anutuko yiyoro potó moré kini tiní eneŋo unipareyó tunoqetenge. ^e 1:11 “*miti mande*” ŋuko Anutuko *Kristo* asáŋoní khumoro quhurinanimboru kimo tiní Anutu koya newonde kanata tewero ŋuro mande meté mu nange.

Anutuko Pol samaka-samaka tuwó inaró

¹²Uni Paráminani Kristo Yesu^f wimbu re nunaró ñundo no kho meté teyoteno ñu niyo iñoro eneño khoyó tewero rokó nereró. Ñuro yungunañoyoteno. ¹³Hamó, komo no yesaráñoro eneño unipareyó sangirí te yunoro kuma parámi teyanowó. Quko ene ñande iñaró, komo no iño-iñone meté horé kini, iñowe tondañewero mepémo kini, ko kama iñondutuwoyanowó. Ñu murí ñuro no sikíne te nunaró. ¹⁴Paráminanimbo samaka-samaka tuwó^g parámi nunaró. Ñunde tiní Kristo Yesuko newondene okokowoní ene iñondutuwooro newonde meté unipare yunoyoteno.

¹⁵Mande ñako hamó tiní meté unipare soso iñowaño: ko Kristo Yesuko quhurí unipare rambaruru koñgo yorewero quro nokono maheró. Ko nondoko uni piyimi horé; hamó, unipare piyimi yotengo ñuro uni kembé ñuko no. ¹⁶Quko Kristo Yesuko sikíne te nunoro topé kama taró. Ñuro tero enendo unipare imemongo ene iñondutuwooro yoto-yoto suki-suki rewango ñu otete meté ñu witú yereró. ¹⁷Anutu ñuko wiri yerete uni suki-suki yoweya qu, kama khumoweya, norendo qenewero mepémo kini. Eneko Anutu hamó kanata na. Ñunde ñuro naru suki-suki owí hokoya owé parámi inato. Ñu hamó.

¹⁸Timoti neneño nañone, mande kondé ña kimiroteno, dokoro ñande iñoteno, komo ye-ye unindo keñomboro mande kumi yañgurí. Ke meté keño ye-ye mande^h yañgurí ñuro iñoya wimbu titiyoya keño khoke te qembe. Kho ñuko kuma meté mu qembe, ko keto kuma uni qembe tunoqaró. ¹⁹Ñunde tero iñondutu taró ñu kondé toworo otete sopowero quro iño-iñoke meté mu nañge howe qembe. Uni kumimbo iño-iño meté ñu huwóñoro wañgoko toro puñomo tokoñaró qembe iñondutuye ri piyo taró ñu. ²⁰Himeneus koya Aleksanda koya ñunde nañge tariyó. Otete piyimi tiriqo, nondo yorero Monimbu kandímo yorotanowó. Ñunde tero otete meté mu qene iñoro imemongo Anutu pitu ko kama yesaráñowari.

Yambo hariri tewero quro oresaka mande

2 ¹Asa ko koretero kondé ñande yimiroteno, ko ye haririko Anutu nekero unipare soso samaka yerewero quro hariri tero o tukuni tetengo ñuro kirayoya Anutu yungunañoyuri qembe. ²Ye wiri yerete uni soso koro hariri teyuri qembe. Ñunde tero nore soso meté kunditero,

^f 1:12 “Kristo Yesu” - komo suki ye-ye unindo Anutuko uni ka rokóñoní mahero wiri yerete uni parámi horé tunoqeweya qu karo yañgurí. Juda unipareto uni maheweya ñu, “Kristo,” ma, “*Mesaiya*,” ye nekañgurí. Asa Yesu mahiní eneño unipareyó, “Kristo Yesu,” ma, “Yesu Kristo,” nañge ye nekañgurí. ^g 1:14 “*samaka-samaka tuwó*” ñuko Anutu eneñombo nore samaka yereyote. Kimoyó moré kini. ^h 1:18 “ye-ye mande” ñuko unindo Yuqa noñgo mande ka rero unipare soso yimiraró.

newonde imemo yotoro, Anutu koro murí howero, owé meté mu rewato. ³Ŋu murí ŋuko meté, ko Anutu, Rambaruru Koŋgo Norewero Uni ŋundo ŋuro metéŋoyote. ⁴Enendo uni soso rambaruru ŋu takawaŋgo ŋuro yero iŋoyote, ko mande hamó ŋuro murí ŋu iŋowaŋgo, yero iŋoyote. ⁵Dokoro Anutu kanata na yote. Kowe keweroko uni kanata naŋgeko Anutu koya noreya keweronanimo yote, ŋuko uni ka, Kristo Yesu.ⁱ ⁶Enendo uni soso kimo yerewero^j quro eneŋo yoto-yotoyó rotaró. Rotoní o taró ŋuro piŋa mande naru metémo ŋuno iŋatowó. ⁷Nondo mande ŋuro yesowowero uni ka tunoqero, asáŋowí uni^k tunoqanowó. Kota kini, no hamó yeteno. Nondo kho hamó tero kama rotoro uni wini meyoowo soso miti mande rondaŋe yunoyoteno.

⁸Ŋunde ŋuroko no ŋande iŋoteno, uni yendéne-yendéne soso Anutu koro murí howero kandeye hokoro newonde saŋgírí, kiro mande rotoro hariri tewango, yero iŋoteno.

⁹Ŋundiro naŋge pareto murí meté howero tuwi meté ta naŋge rimiwaŋgo. Asa nakayáye tewero quro huye ma wiwiowero, ko golpe ma pehe koweyemo ma rewero, ko tuwi kimoyó parámi horé mu ma tewero. ¹⁰Kini, ye pare, ye ŋande yeteŋgo, “Nore Anutu potoruku te inoyoteto.” Ŋunde yero iŋoro otete meté mu tewango tiníŋo, otete ŋuko nakayáye ŋunde qembe teweya.

¹¹Pareto Anutu koro mande iŋoteŋgo quno ŋuno meté owéye ri umbuní maŋgoye kusiyowaŋgo. ¹²Nondo pareto Anutu koro mande koro murí rondaŋe yunowaŋgo ŋuro soré yereyoteno. Kowe pareto uni wiri yereweya ŋuro soré yereyoteno. Pare soso maŋgoye kusiyoro mande naŋge iŋowaŋgo. ¹³Dokoro Anutuko Atam korete toworoqota, tukú Ewa towaró. ¹⁴Atamko mande kota ŋu kama iŋondutuwoyaró. Kini. Pare ŋundo mande kota ŋu iŋondutuworo quhurí taró. ¹⁵Quko pareto iŋo-iŋo meté howero khe meté ŋu kama rotoro, unipare newonde meté yunoro, Anutu koro oteteyó howeyowaŋgo tiníŋo, asa simó pisi yerewaŋgo quno ŋuno rambaruru takawaŋgo.

Iŋondutu koro huru-huru ŋuro sopo-sopo uniye

3 ¹Mande ŋako hamó naŋge, ko uni ka, Anutu koro unipare sopo yerewero koro kho qu reweya, yero iŋote ŋuko kho meté mu tewero ŋuro iŋoyote. ²Ŋunde ŋuroko sopo-sopo uni ŋunde quko unipareto oteteyómboro yesaráŋowero mepémo kini. Eneko pare kanata koro kamí

ⁱ 2:5 “Kristo Yesu” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yaŋgurí. Juda unipareto uni maheweya ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋgurí. ^j 2:6 “*kimo yerewero*” ŋuro murí muko ŋandiro: unipareto o piyimi kusunoyómo kusiyowí yoteŋgo. Ŋundiro naŋge Anutuko kimo tero yoriní kina yowaŋgo. ^k 2:7 “*asáŋowí uni*” ŋuko Yesuko rokóŋoro asáŋoní eneŋo khoyó taró.

qembe yotoro eneño yoto-yotoyó meté soporo iño-iño meté qu howero otete meté qu nançe tero uni khe koñgo qu mahi samaka yerero mande rondaqe unipare yunote quño ñuno iñoyi tondañete. ³Uni ñunde quko wain parámi kama neyote ko kiro mande tero kuma kama teyote. Kini, uni samaka yerero newonde ime nançe teyote. Mone rewero quro kama iñoyote. ⁴Uni ñunde quko suwisawiyó meté sopo yiriní eneño simó ará te inoro mañgo howeyotenço. ⁵(Qeni, uni ka suwisawiyó meté kama sopo yereyote ñuko Anutu koro huru-huru ñu meté sopo yerewero mepémo kini, hamómbe?) ⁶Asa sopo-sopo uni ñunde quko naru piru Yesu iñondutuwoyaró. Dokoro itaka nançe iñondutuwooro waka ta sopo-sopo uni tunoqete tiníqo, eneño iñoní oníqo, enendo Monimbu qembe topé piyimi reweya. ⁷Asa sopo-sopo uni ñunde quko sono kama rançurí ñuro toñeyemo owí meté reyote. Ñunde kini tiníqo, owí ri umbuní Monimbu koro powerako towoweya.

Iñondutu koro huru-huru ñuro kho uniye

⁸Ñundiro nançe Anutu koro kho uni tomó-tomó ñuyako unipareto oteteyemoro ará te yunoyotenço. Uni ñunde quko mañgo irisa ñunde qembe kama yotoro wain parámi kama nero mone siyowero quro kama iñoyotenço. ⁹Uni ñunde quko otete sopowero quro iño-iñoye meté mu howero Anutuko iñondutu tewero murí ñu riní tunoqaró ñu iñomukotenço. ¹⁰Koretero khoye towotero qeno qembe. Ene kho meté teroqo Anutu koro kho uniyó yorowañgo.

¹¹Ñundiro nançe kho uni ñuro pare qu ñuko otete meté nançe teyote. Ñunde tero unipare kama yesará yerero, eneño yoto-yotoyó meté soporo, otete meté kama rotoyote.

¹²Anutu koro kho uni ñuko pare kanata koro kamí qembe yotoro, suwisawiyó ñu meté sopo yereweya. ¹³Dokoro uni ñunde ñuko kho meté teyotenço qundo owé meté rero wimbu rero Kristo Yesu¹ kondé iñondutuwoyotenço.

Iño-iño mande parámi ka

¹⁴No keno imemønço ta uyarewero, yero iñoteno. Ko koretero oresaka mande ña nakayáñoyoteno. Ñundiro ¹⁵no keno waka ta uyarewero mepémo kini tiníqo, sokome ña qenero Anutu koro suwisawiyó yimiri iñoro otete meté mu tewañgo. Anutuko yoto-yotoyó moré, ko suwisawiyó ñuko eneño huru-huru^m ñu nançe. Kowe eneño huru-huru ñuko tatá

¹ 3:13 “Kristo Yesu” - komo suki *ye-ye unindo* Anutuko uni ka rokójoní mahero wiri yerete uni parámi horé tunoqeweya qu karo yançurí. Juda unipareto uni maheweya ñu, “Kristo,” ma, “*Mesaiya*,” ye nekañgurí. Asa Yesu mahiní eneño unipareyó, “Kristo Yesu,” ma, “Yesu Kristo,” nançe ye nekañgurí. ^m 3:15 “*huru-huru*” ñuko unipare soso ñundo Yesu iñondutuwooro nokone-nokone ñuno huruwoyotenço qu.

kondé ñunde qembe mande hamó ñu samakanjoyote. ¹⁶Hamó horé, Anutu howewero murí komo tapuñaró ñuko iño-iño parámi ka.

Yesuko uni hamó tunomo tunoqini,
Yuqako, eneko uni ronenejowí, yero nekoní,
sambo simómbo ene qeni,
uni wini enesó-enesó keweroyemo ñuro yesowoyi,
nokono ñuno unipareto ñuro iñondutuwoyi,
Anutuko re koreko oní owé parámi horé raró.

Mande enesó-enesómbo unipareto iñondutuye roworemoyote

4 ¹Yuqa Surumímbo tunomo ñande yete, ko imemoñgo, naru weja quño,ⁿ uni kumimbo iñondutuye roto roto yuqako kaná yereyotenggo qu yohowewango, ko mande ka yuqa piyimimbo^o rondaq yunoyotenggo ñu howewango. ²Mande rondaqeyotenggo ñunde qu kota uni mangoye irisa qundo yeyotenggo, dokoro uni ñuro otete sopowero quro iño-iñoye muko piyo taró, kewámbo qani roworemaró ñunde qembe. ³Ñu uni ñuko unipare epe re-re tewero soré yereyowango, ko o newero qu enesó-enesó soré yereyowango. Quko nore mande hamó ñande iñoteto, Anutuko o newero ñu towaró, ko nore iñondutu unipare, nore meté siyoro Anutu yungunañoro newato. ⁴Dokoro, Anutuko o towaró ñuko soso meté mu nanje. Koretero ye yungunañowango tiniño, oka ma huwóñowero. ⁵Anutu koro mandímboya yeño haririyemboya o soso ñu riní Anutu enejo horé teyote.

Kristo Yesu koro kho uni meté

⁶Ko mande soso ñu rero uni topo yunoweya tiniño, ke Kristo Yesu^p koro kho uni meté ñunde teweya. Ñunde tero ke mande meté mu iñondutuwoyaró quya iño-iño meté mu howeyote quya wimbu kunoní kondéreweya. ⁷Quko uni piyimimbo mande koroqe enesó-enesó yeyotenggo ñu huwóño qembe. Huwóñoro iño-iño rika kondérini Anutu koro murí nanje howe qembe. ⁸Qeno, uni kato kundo tewero quro kowí riní kondéreweya, ko otete ñunde qundo soñga ta samakanjoweya. Quko nore Anutu koro murí howeyoteto quño ñuno otete ñunde qundo nanje nore hamó-hamó samaka nereyote. Hamó, otete ñunde qundo itaka

ⁿ **4:1** “*naru weja*” ñuko naru *Kristoko* pitu ko mahero unipare soso ronda yerero Anutuko o soso hamó wiriweweya. (1 Tesalonaika 2:19; 5:23 koya 1 Korin 15:24-28 weyo qembe.) ^o **4:1** “*yuqa piyimi*” ñuko *sambo simó* ñunde qembe, quko Anutu koro sangiri tero unipare rowore yereyotenggo. ^p **4:6** “*Kristo Yesu*” - komo suki *ye-ye unindo* Anutuko uni ka rokóñoní mahero wiri yerete uni parámi horé tunoqeweya qu karo yanğuri. Juda unipareto uni maheweya ñu, “Kristo,” ma, “*Mesaiya*,” ye nekanguri. Asa Yesu mahini enejo unipareyó, “Kristo Yesu,” ma, “Yesu Kristo,” nanje ye nekanguri.

nokono ŋano o meté nore nunoyote, ko yoto-yoto imemonŋo tunoqeweya ŋunoko o meté nunoweya.

⁹Qeno, mande ŋako hamó ko unipare soso meté iŋoro iŋondutuwowanŋo. ¹⁰Ŋuko ŋandiro: Anutuko yoto-yotoyó moré, ko nore enendo rambaruru koŋgo noreweya ŋuro sopoyoteto. Enendo unipare soso meté yoreweya, ko nore iŋondutu unipareyó hamó noreweya. Asa mande ŋuro koweyumu parámi teyoteto.

¹¹Ke mande ŋa rero unipare yimitoro iŋo-iŋo rondaqe yuno qembe. ¹²Keko simó keta nanŋe, ŋu hamó. Quko uni kato ŋunde ŋuro ma yesará kerewero. Kini, mande meté mu yero, khe u-u meté mu howero, newonde meté unipare yunoro, otete sara qu nanŋe te qembe. Ŋundiro nanŋe iŋondutuke witú yirikata keŋo oteteke qenero kohowewanŋo. ¹³Keto no sopo nereyote quno ŋuno, kho kondé tero sokome⁹ weyoro murí ŋuro yesoworo iŋo-iŋo rondaqe yuno qembe. ¹⁴Komo unindo keŋo ye-ye mande ka^r yaró, ko huru-huru koro tapá unindo kandeye re kembakemo ranŋurí. Ŋunde ti Anutuko kho meté tewero koro puriŋo ka kunaró. Asa ko puriŋo ŋu ma rotowero.

¹⁵Kho ŋuro kondé iŋo qembe. Naru rokóŋo ŋunde tiqo, unipare soso muríŋge qenero niŋgu-niŋgu tewanŋo. ¹⁶Do iŋo-iŋo ka rondaqe yunoyote ŋuya oteteke ŋuya kondé sopo qembe. Ke wimbu rero ŋunde teweya tiniqo, Anutuko khokemo ŋu noŋgo qenero rambaruru koŋgo koreweya, ko ene unipare manŋoke iŋoyotenŋo ŋu ŋuya yoreweya.

Timotiko unipare soso enejo suwisawiyó ŋunde qembe ŋuro ye iŋoweya

5 ¹Ke uni koŋgomu roŋgaru yereweya quno ŋuno saŋgirí ma yunowero. Kini, awanŋe horé ŋunde qembe iŋondutuye ri kondéreweya. Simó keta ŋuya kone-topoke horé ŋunde qembe iŋondutuye ri kondéreweya. ²Pare koŋgomu ŋuya náŋge horé ŋunde qembe iŋondutuye ri kondéreweya. Pare keta ŋuya simó-kuwonŋe horé ŋunde qembe otete sara-sara howero iŋondutuye ri kondéreweya.

Danimbo wapu roŋgaru yerewanŋo?

³Pare wapu horé ŋuro ará te yuno qembe. ⁴Asa pare wapu ka nanŋo-simó moré ko usi-sí moré tiniqo, sowe-soweyómbó Anutu koro oteteyó howero enejo utatáye ŋuro mepé te yunoro náye, umbiye sopo yerero roŋgaru yerewanŋo. Anutuko otete ŋunde ŋuro iŋote. ⁵Asa pare wapu horé ka enemata yorote, quko ŋande iŋote, “Anutuko noriní meté

⁹ 4:13 “sokome” ŋuko Anutu koro mande korete qu, asa Murí Tero yate Malakai kini tete.

^r 4:14 “ye-ye mande” ŋuko unindo Yuqa noŋgo mande ka rero unipare soso yimiraró. Mande ŋunde quko uniparetoro oteteye rondaŋarómbe ma newondeye rukisoyaró.

tewano,” yero kosa suwo rokóŋoro hariri tero Anutu kirayoyote. ⁶Quko pare wapu kato eneŋomboro ye iŋoro niŋgu-niŋgu nanŋe tero howeyote tiniŋo, toní keta yorote, quko ene khumowí ŋunde qembe. ⁷Ŋunde ŋuroko keto pare wapu yimiroyi otete roneneŋowí^s nanŋe ti unipareto eneya mande piyimi kama yewaŋgo. ⁸Ko inji. Uni kato eneŋo suwisawiyómboya iwí-nimí pare-simómboya kama sopo yerero roŋgaru yereyote tiniŋo, ene iŋondutuyó ŋu rotoro, kape uni^t piyimi ŋunde qembe tunoqeyote.

⁹Meté keto pare wapu horémboro owéye nakayáŋoyi huru-huru^u ŋundo samaka yerewaŋgo. Quko pare wapu soso kini, kumima naru 60 ŋunde rotoro komo kamí kanata nanŋe taró ŋuro nanŋe nakayáŋo qembe. ¹⁰Kowe pare wapu meté ŋundo otete meté kumi teyaŋgo ŋu nanŋe owéye nakayáŋo qembe. Asa enendo simóye meté sopo yerero roŋgaru yerewaŋgo, ko uni khe koŋgo qu mahi samaka yerewaŋgo, ko unipare meté horémboro^v sunará teyaŋgo, ko uni quhuriye moré mu samaka yerewaŋgo, ko otete meté nanŋe teyaŋgo. Asa pare wapu o soso teyaŋgo ŋu nanŋe owéye nakayáŋo qembe.

¹¹Quko pare wapu keta quro owéye ma nakayáŋowero. Dokoro koweye saŋaní ŋuro yero iŋoyiqo, Kristo^w koro kho qu rotoro kame tewero pitu ko iŋowaŋgo. ¹²Asa ko topé piyimi rewanaŋgo, dokoro ŋundiro mande koretero kusiyangurí qu ka wendaqetenga. ¹³Ko ene otete kaŋuya teyotenga. Wimbuma tero ya enesó-enesó ŋuno wimbo-wimbo kunditero unipare kumimbo o teyaŋgo ŋu iŋoro uyare mahe tero unipare meyowomboro huwó mande ye yunoyotenga. ¹⁴Ŋunde ŋuroko no iŋoteno pare wapu keta qundo meté kame tero simó pisiyoro yaye ŋu sopowaŋgo. Unipareto otete piyimiye ŋu qenero huwó yerewaŋgo koro. ¹⁵Hamó, pare wapu kumimbo ore meté ŋu rotoro Monimbu koro khe qu howewaŋgo.

¹⁶Asa iŋondutu pare kato nimímbe ma umbí pare wapu taró tiniŋo, ene meté sopo yerero roŋgaru yereweya. Ŋunde tiniŋo, huru-huru ŋundo koweyumu kama tero pare wapu enesó yorotenga qu meté samaka yerewaŋgo.

Huru-huru koro tapá uni kho meté

teyotenga ŋu roŋgaru yiri qembe

¹⁷Huru-huru koro tapá uni kho meté teyotenga ŋu, ará te yunoya kimoye yunoyi qembe. Ko tapá unindo Anutu koro mande qu wisiyoro

^s 5:7 “otete roneneŋowí” ŋuko Anutuko nore rokó yirini noreŋo murínani eneŋo murí howeyote. ^t 5:8 “kape uni” ŋuko Israel koro Anutuye ŋu kama iŋo howeyotenga.

^u 5:9 “huru-huru” ŋuko unipare soso ŋundo Yesu iŋondutuworu nokone-nokone ŋuno huruwoyotenga qu. ^v 5:10 “unipare meté horé” ŋuko oteteye soso muko meté nanŋe kini. Kini, owé ŋu “unipare meté horé” ŋuro murí muko ŋandiro, “Anutu koro unipare” nanŋe.

^w 5:11 “Kristo” ŋuko Yesu nanŋe, asa Anutuko rokóŋoní mahero wiri yerete uni parámi horé tunoqaró ŋu.

unipare yunoyoteŋgo ŋu, ará parámi te yunoya kimoye yunoyi qembe. ¹⁸Dokoro sokomeko ŋuno ŋande nakayaŋaró, “Makaoko rais kowí khete rumuniŋoyote quuno ŋuno maŋgoye ma kusiyowero.”^x Ko mande kaŋuya ŋande yete, “Kho uni ŋu meté kimoye rewango.”^y ¹⁹Asa naru kano uni kanata kato ŋande yeweya, “Tapá uni ŋundo o piyimi ta.” Topone, mande ŋunde yiniŋo, kusumbo ma rewero. Asa uni irisape ma uni kapusa ŋunde quundo yiqota maŋgoye iŋo qembe. ²⁰Ko uni kembé kumimbo o piyimi tiŋo, yorero uni soso toŋeyemo roŋgaru yere qembe. Ŋunde ti meyowo ŋu yiyoro sasaro tewango.

²¹Anutu koro toŋímo ko Kristo Yesu^z koro toŋímo ko sambo simó^a Anutuko rokó yereró ŋuro toŋeyemo, no ke kimiroteno, mande soso ŋa iŋoro roneneŋo sopo yere qembe. Uni owí morémbe ma owí moré kini guro ore kanata na howero roŋgaru yere qembe.

Timotiko eneŋo murí meté roŋgaruwoweya

²²Ke kho uni ka rokóŋoro kandeke saŋaniŋmo waka ta ma rewero. Ko mande kaŋuya ŋandiro, uni meywomboro quhurí teyoteŋgo ŋuya nembe ma rewero. Anutu toŋímo sara yowero ŋuro keŋomboro iŋo qembe.

²³Sono kiŋo naŋge ma newero. Kini, qahunŋe samakaŋoro se khumo qahunŋemo yote ŋu riní kini tewero guro wain soŋga ta ne qembe.

²⁴Uni kumimboru quhuriye muko tunomo yote, unipare ronda yerewero naruyómo ŋuno piŋa mandeye waka ta areweya. Quko uni kumimboru quhuriye muko sóqeyote. Imemoŋgo naŋge tunomo tunoqeweya. ²⁵Ŋundiro naŋge otete meté mu tunomo yote. Quko otete meté mu itaka sóqeyote ŋu ŋuya imemoŋgo tunomo tunoqeweya.

Kho simómbo kho meté naŋge tewango

6 ¹Anutu koro unipare soso unindoro kho simó yoteŋgo qu, eneŋo uni parámiye ŋuro ará te yunoyuri qembe. Unipareto oteteye qenero Anutu koro owí ŋuya miti mande ŋuya yesaráŋowango koro. ²Asa iŋondutu unindo kho simó ka sopoyote tiniŋo, kho simó ŋuko parámiyó ŋuro ma iŋowero, “Ŋuko topone, enina, no meté mandí wendaqewano.” Kini, kho meté horé naŋge te inowango. Dokoro parámiyó Anutu iŋondutuwoní Anutuko ene surumí iŋo yunoyote. Asa naru rokóŋo unipare iŋo-iŋo ŋa yunoya newondeye ri kondéreweya.

^x 5:18 Hutuŋo Mande 25:4 ^y 5:18 Luk 10:7 ^z 5:21 “Kristo Yesu” - komo suki *ye-ye unindo* Anutuko uni ka rokóŋoní mahero wiri yerete uni parámi horé tunoqeweya qu karo yangurí. Juda unipareto uni maheweya ŋu, “Kristo,” ma, “*Mesaiya*,” ye nekaŋgurí. Asa Yesu mahiní eneŋo unipareyó, “Kristo Yesu,” ma, “Yesu Kristo,” naŋge ye nekaŋgurí. ^a 5:21 “*sambo simó*” ŋuko komo suki-suki Anutuko unipare kama yoriní tunoqi sambo simó yondowaró. Ko itaka eneŋo sunará teyoteŋgo.

Wondo situwi ŋuro kondé iḡowero murí

³Uni kato mande koroqə rondaqə yunoro Uni Paráminani Yesu Kristo^b koro mandímboya Anutu koro murí ŋuro iḡo-iḡo ŋuya huwóḡoyote tiníqo, ⁴uni ŋuko eneḡo owí hokoyote nange, oka kama iḡoní tondaḡete. Kini. Epe taka-taka tewero iḡo-iḡo piyimi ŋuro iḡoyote ko o tomó ta ka ŋuro kiro kuma teyote. Oteteyómbó unipare yoríní newonde tutu tero, kiro kuma tero, unipare meyowo yesará yerero, topoyemboro newonde piyimi teyoteḡo. ⁵Ko naru rokóḡo uni piyimi ḡundo epe kiro-kiro yeyoteḡo. Otete piyimi soso ḡundo uni ŋuro iḡo-iḡoye rambaruruwoní mande hamó mu qene iḡowero mepémo kini. Ḥunde tero ḡande iḡoyoteḡo, “Nore Anutu koro murí howeroqota nokono wondo situwi parámi rewato.”

⁶Quko nore Anutu koro murí howeroqota date yoteto ŋuro metéḡowato quno ḡuno o meté horé rewato. ⁷Dokoro ná-námanimbo pisi nereḡurí quno onani moré kini tunoqatowó. Ko khumowato quno ŋuya oka kama se toḡewato. ⁸Nore o newero qu, tuwi teyoteto, ŋuko mepémo ḡu.

⁹Unipare wondo koro iḡoyiqo, situwiyembo towo yiríní situwi parámi rewero nuḡurí ŋuko powerako uyi kondé yondowoyote. O parámi ŋuro iḡoyoteḡo quno ḡuno newondeye aríní otete piyimi kate-kate howero piyo temukoteḡo. ¹⁰Mone rewero iḡo-iḡo ŋuko otete piyimi kate-kate ŋuro murí. Uni kumi mone koro iḡoyoteḡo, ḡu otete ḡundo yowosoní iḡondutuye rotoyí o piyimi kate-kate newondeye saḡawoní piyo tewawḡo.

Polko Timoti roḡaruwaró

¹¹Quko ke Anutu koro uni, otete piyimi ḡu soso qene sorero huwóḡo qembe. Ḥunde tero murí ḡaro howe qembe: otete roneneḡowí,^c Anutu koro murí, iḡondutu rewero murí, unipare newonde yunowero murí, quhurí kondé korowowero murí, unipare newonde ime yunowero murí. ¹²Iḡondutu teyote ḡu meté howero kho kondé te qembe. Komo Anutuko yoto-yoto suki-suki rewero quro rokó kiríní iḡondutu tero unipare qambu toḡeyemo ŋuro yesowaró. Asa yoto-yoto suki-suki ḡu kondé towo qembe. ¹³Anutuko o soso quro yoto-yotoye yunoyote, ko komo Kristo Yesu^d

^b 6:3 “Yesu *Kristo*” - komo suki *ye-ye unindo* Anutuko uni ka rokóḡoní mahero wiri yerete uni parámi horé tunoqeweya qu karo yaḡurí. Juda unipareto uni maheweya ḡu, “Kristo,” ma, “*Mesaiya*,” ye nekaḡurí. Asa Yesu mahíní eneḡo unipareyó, “Kristo Yesu,” ma, “Yesu Kristo,” nange ye nekaḡurí. ^c 6:11 “*otete roneneḡowí*” ŋuko Anutuko nore rokó yiríní noreḡo murínani eneḡo murí howeyote. ^d 6:13 “*Kristo Yesu*” - komo suki *ye-ye unindo* Anutuko uni ka rokóḡoní mahero wiri yerete uni parámi horé tunoqeweya qu karo yaḡurí. Juda unipareto uni maheweya ḡu, “Kristo,” ma, “*Mesaiya*,” ye nekaḡurí. Asa Yesu mahíní eneḡo unipareyó, “Kristo Yesu,” ma, “Yesu Kristo,” nange ye nekaḡurí.

kaŋero Pontius Pailat toŋímo mande meté tunomo yesowaró. Asa no Anutu koya Kristo Yesu toŋeyarimo no mande kondé ŋande kimiroteno. ¹⁴Mande kondé kimiroteno ŋu meté howero o koroqe ma tewero. Hamó, otete meté mu naŋge howeyuriyate Uni Paráminani Yesu Kristo tunoqe maheweya. ¹⁵Enendo naru Anutuko rokóŋaró ŋuno maheweya. Asa Anutu ŋuko meté horé, ene kanata ŋundo naŋge o soso sopoyote. Enendo wiri yerete uni wiri yereyote, ko ene uni pará-pará soso koro uni parámiye. ¹⁶Enendo naŋge kama khumoweya. Hiyó parámimo yorote, ko nore taŋgímo uyarewero mepémo kini. Uni kato ene kama qeneró, ko qenewero mepémo kini. Naru suki-suki owí hokato wimbí kondé yoroweya. Ŋu hamó.

¹⁷Ke noko koro onono uni ŋande yimirika iŋowaŋgo, owéye ma hokowero. Wondo situwi ŋu kuyepo kini teweya, peka. Ŋunde ŋuroko ye situwi ŋu ma iŋondutuwwero. Kini. Anutu naŋge iŋondutuwoyi, dokoro Anutu eneŋombo nore o parámi nunoní niŋgu-niŋgu teyoteto. ¹⁸Ke ŋande yimirika iŋowaŋgo, otete meté mu naŋge parámi ti qembe. Ko unipareto kira yereyoteŋgo quno ŋuno parámi yunoya samaka yiri qembe. ¹⁹Ŋunde tero o meté horé ŋu koporo naru imemoŋgo tunoqeweya quno meté yowaŋgo, ko yoto-yoto hamó horé ŋu kondé towoyi.

²⁰Timoti, Anutuko kho kunaró ŋuro kondé sopo qembe. Mande enesó-enesó qundo Anutu koro iŋo-iŋo qu kama howete ŋu huwóŋgo qembe. Naru kano unindo iŋo-iŋo enesó-enesó ŋuro epe mito-mito tero, yate-yate ŋande iŋoyoteŋgo, “Nore ŋundiro iŋomukowato.” Quko ŋunde kini, iŋo-iŋoye kota naŋge. Ŋu ŋuya huwóŋgo qembe. ²¹Uni kumi iŋo-iŋo ŋunde qu howero iŋondutuye rotaŋguri.

Anutu koro samaka-samaka tuwó yeya yoní.